

【台灣教會史 ê 台文筆記 4】

228消失的執事：

李瑞漢律師

1947年3月初10，李瑞漢受掠，無法度擔任執事 ê 職務。

張德麟／牧師，中山醫學大學台灣語文學系退休教授

佇白話字《教會公報》ê 時代，辯護士（律師）刊廣告--ê，人數無濟。我印象 khah 深--ê 有安里積千代、顏春和、李瑞漢 kap 戰後 ê 張英傑（張俊雄 ê 老父）。這幾個律師背後攏有 in ê 故事。咱今仔日來論李瑞漢。

李瑞漢律師 ê 一生，許雪姬教授總策劃 ê 《台灣歷史辭典》，李瑞漢 ê 部分（李筱峰教授撰）是一種典型 ê 寫法：「1926年台中中學畢業後赴日本。進中央大學法科，在學中即通過『辦理士』（相當今日的專利申請專業人）考試。1929畢業後，留校研究法律年餘。1930通過司法科高考，返台在台北市永樂町執業律師。二次大戰戰後，當選台北市律師公會會長。1947年二二八事件爆發，曾於3月初召集台北市律師公會開會，對陳儀政府提出改革意見，此外無激烈行為。然於3月10日與同樣執業律師的胞弟李瑞峰……及其友人林連宗……，一同於家中被軍警拘捕，一去不回。」

這是一段真簡捷 ê 記載，咱對其他 ê 冊，可比講《二二八消失的台灣菁英》，mā 看著「留日、律師、228受害者」這幾項要素綜合起來 ê 李瑞漢。按呢寫，無 m̄ 著。M̄-ku 「基督徒李瑞漢」佇這款 ê 文字內，soah 看未著。下面，筆者就淡薄--á 補一寡「基督徒李瑞漢」ê 史料，予咱 khah 完整了解李瑞漢 kap 伊 ê 家族。

一、李瑞漢會成做基督徒，是受伊 ê 太太邱己妹 ê 影響。邱己妹，新竹人。伊 ê 親族 iáu 真濟佇新竹市的長老教會 teh 禮拜。邱己妹 ê 老母張月妹是基督徒，是新竹市張松家族 ê 人。邱己妹公學校畢業了，去讀淡水女學。佇淡水女學，伊 kap 陳信貞（鋼琴家）、陳碧雲（吳天命牧師娘）是全班同學。邱己妹淡水女學畢業後，去日本針灸專門學校讀冊。佇欲去日本 ê 船頂，邱己妹看著一個無錢通買船票 ê 台灣人，匿佇船--nih，予人查--著。船公司欲 ká 伊送轉去台灣。這

時，邱己妹發現一個大學生（李瑞漢），kā 帽子 liù--起-來，péng--過-來，做奉獻袋，為這個台灣人募款買船票。邱己妹真欣賞李瑞漢 ê 愛心，就按呢，兩人交陪、戀愛。受邱己妹影響，李瑞漢佇日本青山基督教會受洗，成做基督徒。

二、李瑞漢畢業後，轉來台灣結婚、開業。Kā 李鐘聲（生）先生租一間厝做律師事務所。這個事務所佇永樂町，李瑞漢全家就佇附近 ê 大稻埕教會禮拜。亦因為這個緣故，李瑞漢兒女 ê 主日學印象，攏佇大稻埕教會。

李瑞漢 bat 予人選做執事。《大稻埕設教120週年特刊》第21頁，1941/4/27條記：「二木八重子（連任）執事、李蔚然、柯潤澤、二木文三、李瑞漢（新任）執事、郭江氏心及謝火爐因故擇期就任。」1947年3月初10，李瑞漢受掠，無法度擔任執事 ê 職務。《大稻埕設教140週年特刊》可能因為按呢，伊執事 ê 任期做到叨一日，《特刊》無記。佇遮，欲 kā 大稻埕教會講，李瑞漢 ê 任期咱現在 ê 記錄方式真好，會使予後輩一直問，這人是按怎無記任期到叨一日？若是欲記，筆者佇遮建議，記1947年3月初10。

佇遮愛擱記，邱己妹 mā 擔任過大稻埕教會 ê 執事，任期 tùi 1953/7/5到1959/10/9，伊 mā 做過教會附設純心幼稚園 ê 園長。

三、我相連續寫白話字《教會公報》ê 廣告。李瑞漢律師 bat 刊過一年 ê 廣告，時間 tùi 1940年8月到1941年7月。廣告文按呢寫「辨理士辯護士 李瑞漢 台北市永樂町三ノ五九九六番」。

四、佇李筱峰教授彼本《二二八消失

的台灣菁英（1）》中，有記「李瑞漢曾經幫長老基督教會與日本官方的財務糾紛打官司」。為著這句話，筆者特別請教李瑞漢 ê 大子李榮昌先生。伊 kā 我講，這項代誌伊有印象。有一工，厝--nih 來真濟日本警察，伊會記得 in 老父有提起「馬偕病院」這個名。

五、李月美姐是李瑞漢 ê 查某子。In 老父子人掠去 ê 時伊 chiah 10歲。佇彼段時陣，伊攏 tòe 老母 tòe 牢牢。有一暗，半暝睏起來，揣無老母。伊驚一 tiôh，緊 peh--起-來。看 tiôh 老母佇眠床頭迫切 teh 祈禱。月美姐就去跪佇老母 ê 身軀邊，kap 老母相恰祈禱。M-ku，實在傷愛睏，iáu 未祈禱 soah，伊就睏 kah m̄ 知人矣。

月美姐講伊 kap 老母真親，佇老母 ê 身軀邊 tòe 前 tòe 後，所以一寡仔細節伊攏會記得。伊講，魷魚是李鐘聲 ê 太太送--ê，是三尾，m̄ 是兩尾。In 老母切絲煮魷魚糜。伊 koh 強調，真濟記 in 厝 ê 文章，攏寫 in 兩間日本厝相連。伊講，按呢記嘛 m̄ -tiôh，兩間厝是獨立 ê。目前，這兩間厝 kap 建商合作起大樓，樓腳 sòe「摩斯漢堡」。

佇這篇文章，筆者補充一寡仔「基督徒李瑞漢」ê 資料，向望幫贊咱攏 khah 了解李瑞漢。

註：

李瑞漢救一個無買船票 ê 台灣人，是佇台灣去日本 ê 船頂，抑是日本欲來台灣 ê 船頂？有無全 ê 講法。筆者佇遮 ê 描寫是照李月美姐的提供 ê 資料。